

आकाशवाणी जयपुर-अजमेर

प्रादेशिक समाचार

- उपराष्ट्रपति जगदीप धनखड़ कह्यो-देश मांय फैसला लेवण री प्रक्रिया साफ अर जवाबदेह है।
- राज्यपाल कलराज मिश्र कह्यो-विश्वविद्यालयां मांय गुणवत्तापूर्ण शिक्षा रा प्रबंधन माथे सरकार रो खास ध्यान।
- प्रदेश मांय काल राष्ट्रीय लोक अदालत लगायी जावेला- राजीनामा रे जरिये मामला निपटाया जावेला।
- जयपुर, भरतपुर संभाग अर शेखावाटी हलका मांय आज कठे-कठे बिरखा व्ही।

000

उपराष्ट्रपति जगदीप धनखड़ कह्यो है के देश मांय फैसला लेवण री प्रक्रिया पारदर्शी अर जवाबदेह है। वे आज मुंबई मांय 'सशक्त भारत: विकसित भारत 2047 बनाने में उच्च शिक्षा संस्थानों की भूमिका मुद्दा माथे राख्यी ज्या कार्यक्रम मांय बोल रह्या हा। वे कह्यो के विश्व बैंक भारत री निवेश अर मौका रा वैश्विक केन्द्र रा तौर ऊं सराहवणा कीनी है। उपराष्ट्रपति कह्यो के अंतर्राष्ट्रीय मुद्रा कोष दूजा देशां सारू रोल मॉडल रा तौर ऊं भारत मांय डिजिटल तरीका ऊं लेनदेन री सराहवणा कीनी।

0000

प्रधानमंत्री नरेंद्र मोदी शांतिपूर्ण, समृद्ध, सुव्यवस्थित अर सुरक्षित बिम्सटेक हलका री प्रतिबद्धता दोहराई है। वे माली अर सामाजिक विकास सारू इंजिन रा तौर ऊं बिम्सटेक री भूमिका माथे जोर दीनो। बिम्सटेक रा सदस्य देशां रा विदेश मंत्री आज नई दिल्ली मांय प्रधानमंत्री नरेंद्र मोदी सागे मुलाकात कीनी। ई दौरान कनेक्टिविटी, ऊर्जा, कारोबार, स्वास्थ्य, खेतीबाड़ी, विज्ञान, अर सुरक्षा समेत क्षेत्रीय सहयोग ने मजबूत बणावण रा बारा मांय चर्चा करीजी। प्रधानमंत्री सितंबर महीना मांय व्हेवण वाळा बिम्सटेक शिखर सम्मेलन सारू थाईलैंड ने भारत री हिमायत री बात कही।

0000

राज्यपाल कलराज मिश्र कह्यो है के कृत्रिम बुद्धिमत्ता (आर्टिफिशियल इन्टेलिजेन्स) इंसानियत रा भला ऊं जुड़्या मुद्दां माथे काम ली जावणी चाहिजे। वे आज जोधपुर रा एम.बी.एम विश्वविद्यालय रा दीक्षांत समारोह मांय बोल रह्या हा। राज्यपाल विद्यार्थियां ऊं आब-ओ-हवा मांय बदलाव अर भांत-भांत री परेशानियां आगी करण मांय योगदान देवण बाबत कह्यो। वे प्रौद्योगिकी शिक्षा रा तहत विश्वविद्यालयां कानी ऊं नौजवानां नवाचारां ऊं जोड़बा बाबत कह्यो। राज्यपाल कह्यो के तकनीकी शिक्षा रो मकसद विद्यार्थियां रा बूता री पिछाण कर र वां ने आवता बगत रा मौकां

सारू तैयार करणो है। वे "नेट जीरो" रो लक्ष्य हांसिल करण सारू तकनीकी शिक्षा माथे जोर दीनो।

राज्यपाल 19 विद्यार्थियां ने सोना रा तमगा दे र नवाजा। दीक्षांत समारोह मांय साल 2022 अर 2023 मांय पास व्ह्या 680 विद्यार्थियां ने स्नातक री उपाधियां दे र नवाजी ज्या।

0000

लोकसभा अध्यक्ष ओम बिरला रूस मांय राख्यी ज्या ब्रिक्स संसदीय सम्मेलन रे दौरान ताजिकिस्तान री संसद रा अध्यक्ष जोकिर-जोदा महमद-तोहिर जोहिर सागे मुलाकात कीनी। ई दौरान दोन्यू नेता दोन्यू देशां री संसदां बीचे मदद बधावण रा बारा मांय विगतवार चर्चा कीनी। बिरला ताजिकिस्तान री संसद रा अध्यक्ष ऊं वठे पढ़ रह्या भारत रा विद्यार्थियां रो ध्यान राखण री अरज कीनी। बातचीत रे दौरान ताजिकिस्तान री संसद रा अध्यक्ष कह्यो के ने कहा कि वहां भारतीय संगीत काफी लोकप्रिय है। उन्होने कहा कि दोनो देशों के मध्य मजबूत ऐतिहासिक, सांस्कृतिक और भाषाई संबंध हैं।

000000

राज्य विधानसभा मांय 10 जुलाई ने पेश करी ज्या बजट मांय किसानां रा सुबीता सारू करी ज्या न्यारा-न्यारा ऐलाण रो आभार जतावण सारू भाजपा किसान मोर्चा री ओर ऊं आज जयपुर मांय मुख्यमंत्री भजनलाल शर्मा रा रेहवास माथे खास कार्यक्रम राख्यी ज्यो। कार्यक्रम मांय केंद्रीय कृषि अर किसान कल्याण राज्य मंत्री भागीरथ चौधरी ई मौजूद हा। ई दौरान किसान बजट मांय करी ज्या प्रावधानां माथे खुशी जताता थकां राज्य अर केन्द्र सरकार रो धन्यवाद कीनो।

000

भारतीय जनता पार्टी रा प्रदेश अध्यक्ष सी.पी. जोशी कह्यो है के राज्य रो बजट विकसित राजस्थान, समृद्ध राजस्थान री नींव बणेला। वे आज जयपुर मांय भाजपा रा प्रदेश कार्यालय मांय खबरनवीसां सागे बातचीत कर रह्या हा। जोशी कह्यो के बजट मांय पाणत अर पीवण रा पाणी सारू केई प्रावधान करी ज्या है। वे कह्यो के राज्य रा 25 लाख घरां मांय नळ रे जरिये पाणी पूगावणे तय करी ज्यो है। जोशी कह्यो के आदर्श सोलर ग्राम योजना रे मार्फत प्रदेश रा दो लाख घरां मांय बिजली पूगायी जावेला।

00000

प्रदेश मांय काल राष्ट्रीय लोक अदालत लगायी जावेला। विधिक सेवा प्राधिकरण री ओर ऊं ई साल दूजी दफा लगाई जा रही लोक अदालतां मांय राजीनामा रे जरिये मामला रो निपटरो कर्यो जावेला। राष्ट्रीय लोक अदालत रा तैत मामला री सुणवाई सारू पांच सौ बारह बैच बनायी ज्यी है। आं मांय ऑनलाइन अर आमी-सामी, दोन्यू तरीका ऊं मामलां री सुणवाई करी जावेला। ऐ लोक अदालतां राजस्थान हाईकोर्ट री जोधपुर अर जयपुर पीठ, प्रदेश री सगळी नीचली अदालतां, राजस्व अदालतां, उपभोक्ता मंच अर प्रशासनिक अधिकरणां मांय लगाई जावेला। हाईकोर्ट री जोधपुर पीठ मांय दो हजार अर जयपुर पीठ मांय करीब पौने तीन हजार मामलां री सुणवाई

रो कार्यक्रम है। जनता ने लोक अदालतों की जाणकारी देवण सारू राज्य मांय न्यारा—न्यारा कार्यक्रम राख्या जा रह्या है। भरतपुर जिला मांय 10 हजार ऊं बत्ता मामलां की सुणवाई करी जावेला। जिला विधिक सेवा प्राधिकरण बीकानेर की सचिव रैना शर्मा बतायो के जिला मांय 17 बैच बनायी ज्यी है।

0000

एक पेड़ मां के नाम अभियान रा तैत राज्य मांय न्यारी—न्यारी ठोड़ां पौधा रोप्या जा रह्या है। राजस्थान बटालियन एनसीसी कैडेट्स रा जयपुर ग्रुप मुख्यालय की ओर ऊं जयपुर कने जोबनेर रा श्री कर्ण नरेंद्र कृषि विश्वविद्यालय परिसर मांय आज पौधा रोपी ज्यो। एनसीसी ऑफिसर लेफ्टिनेंट डॉ. बी. एल. दूदवाल बतायो के आ पौधा की देखभाल तय करी जावेला। विश्वविद्यालय रा कुलपति प्रोफेसर बलराज सिंह कैडेट्स ने जनता मांय पौधा रोपण सारू जाग जगावण की शपथ दिराई। **एक पेड़ मां के नाम** अभियान रा तैत बूंदी जिला मांय 14 लाख 13 हजार ऊं बत्ता पौधा रोप्या जावेला। जिला कलेक्टर अक्षय गोदारा आज न्यारा—न्यारा महकमां रा अहलकारां की मीटिंग ले र इण की तैयारियां रो जायजो लीनो। पाली जिला रा मारवाड़ जंक्शन अर सुमेरपुर हलका मांय नीम, पीपल अर दूजा फलदार पौधा रोपी ज्यो। मारवाड़ जंक्शन हलका रा ईसाली गांव रा गौचर मांय प्रधान मंगलाराम देवासी गांव वाळा सागे डोढ़ हजार ऊं बत्ता पौधा रोप्या।

जयपुर कने बस्सी रा डेयरी अर खाद्य प्रौद्योगिकी महाविद्यालय मांय **“एक छात्र—एक पेड़”** कार्यक्रम रा तहत आज 51 पौधा रोपी ज्यो।

00000

मुख्यमंत्री भजनलाल शर्मा भीलवाड़ा जिला मांय रीको कानी ऊं नुवो औद्योगिक हलको विकसित करण की मंजूरी दे दीनी है। नुवो औद्योगिक हलको जिला की आसींद तहसील रा मोड़ का निम्बाहेड़ा मांय करीब सौ हेक्टेयर जमीं माथे बनायो जावेला।

000

हनुमानगढ़ जिला रा स्थापना दिवस रे मौके आज ई न्यारा—न्यारा कार्यक्रम राख्या ज्यो। साल 1994 मांय आज ही रा दिन श्रीगंगानगर जिला ऊं न्यारो हनुमानगढ़ जिलो बनायी ज्यो हो।

0000

राज्य रा उत्तराद अर ऊगणी हलकां मांय आज ई केई ठोड़ां बिरखा व्ही। भरतपुर अर जयपुर संभाग सागे शेखावाटी हलका मांय कठे—कठे मेह बरस्यो। कोटा मांय आज सिंज्या बिरखा व्हेवण ऊं गर्मी ऊं साता मिली। **टोंक** अर **श्रीगंगानगर** मांय ई सिंज्या की पोर झमाझम बिरखा व्ही। मौसम केन्द्र जयपुर रे मुजब कोटा, जयपुर अर भरतपुर संभाग रा कुछ हलकां मांय आवता दो—तीन दिन बिरखा रा आसार जताया है। महकमो 16 जुलाई ऊं राज्य रा ऊगणी हलकां मांय बिरखा मांय बधोतरी व्हेवण अर कोटा अर उदयपुर संभाग मांय कठे—कठे जोरदार मेह बरसण रा आसार जताया है। बीकानेर संभाग रा कुछ हलका मांय आवता दो—तीन दिन बिरखा व्हेवण की संभावना है। जदके जोधपुर संभाग रा घणखर हलकां मांय आवता तीन—चार दिन मौसम सूखो रेहवण रा आसार है।